

PWYLLGOR SGRIWTINI CORFFORAETHOL

Cofnodion y cyfarfod arbennig a gynhaliwyd ar 14 Ionawr 2020

- YN BRESENNOL:** Y Cynghorydd Aled Morris Jones (Cadeirydd)
Y Cynghorydd Dylan Rees (Is-gadeirydd)
- Y Cynghorwyr Lewis Davies, John Griffith, Richard Griffiths, Richard O. Jones, Bryan Owen, Alun Roberts, J. Arwel Roberts, Nicola Roberts.
- Aelodau Cyfetholedig: Mrs Anest Frazer (Yr Eglwys yng Nghymru), Mr Dyfed Wyn Jones (Rhiant Lywodraethwr – Sector Ysgolion Cynradd), Mr Keith Roberts (Yr Eglwys Gatholig)
- Aelodau Portffolio**
- Y Cynghorydd Llinos Medi Huws (Arweinydd ac Aelod Portffolio y Gwasanaethau Cymdeithasol)
Y Cynghorydd R. Meirion Jones (Aelod Portffolio Addysg, Llyfrgelloedd, Diwylliant ac Ieuencid)
Y Cynghorydd Robin Williams (Aelod Portffolio Cyllid)
Y Cynghorydd R. G. Parry, OBE, FRAgS (Aelod Portffolio Priffyrdd, Eiddo a Gwastraff) (*ac Aelod Lleol mewn perthynas ag eitemau 2 a 3 ar y rhaglen*)
- WRTH LAW:** Prif Weithredwr
Cyfarwyddwr Addysg, Sgiliau a Phobl Ifanc
Cyfarwyddwr Swyddogaeth (Adnoddau)/Swyddog Adran 151
Rheolwr Gwasanaethau Cyfreithiol
Rheolwr Rhaglen, Cynllunio Busnes a Rheoli Perfformiad
Rheolwr Rhaglen (CS)
Rheolwr Sgriwtini (AGD)
Swyddog Pwyllgor (ATH)
- YMDDIHEURIADAU:** Llio Johnson (Rhiant Lywodraethwr – Sector Ysgolion Uwchradd)
- HEFYD YN BRESENNOL:** Sioned Rowe (Swyddog Sgriwtini), Mr Gareth Parry a Llinos Roberts (ar ran Ysgol Gymuned Bodffordd (ar gyfer eitem 2), Mr Dafydd Jones (ar ran Ysgol Corn Hir (ar gyfer eitem 2), Mr Islwyn Humphreys ac Emma Evans (ar ran Ysgol Talwrn (ar gyfer eitem 3), Dr Iestyn Pierce (ar ran Ysgol Y Graig) (ar gyfer eitem 3)

Croesawodd y Cadeirydd bawb a oedd yn bresennol i'r cyfarfod arbennig o'r Pwyllgor Sgriwtini Corfforaethol, gan gynnwys rhieni a chynrychiolwyr Ysgol Gymuned Bodffordd, Ysgol Corn Hir, Ysgol Talwrn ac Ysgol Y Graig.

1 DATGANIAD O DDIDDORDEB

Datganodd y Cynghorydd Dylan Rees ddiddordeb personol ond heb fod yn un rhagfarnus mewn perthynas ag eitem 2 ar y rhaglen, gan ei fod yn Is-gadeirydd Corff Llywodraethu Ysgol Gymuned Bodffordd a chadarnhaodd, yn dilyn derbyn cyngor cyfreithiol, y byddai'n siarad yn ei rôl fel Aelod Lleol.

Datganodd y Cynghorydd Nicola Roberts ddiddordeb personol ond heb fod yn un rhagfarnus mewn perthynas ag eitem 3 ar y rhaglen, gan ei bod yn aelod o Gorff Llywodraethu Ysgol Talwrn ac Ysgol Y Graig a chadarnhaodd, yn dilyn derbyn cyngor cyfreithiol, y byddai'n cymryd rhan yn y drafodaeth ac yn pleidleisio.

Datganodd y Cynghorydd Richard Griffiths ddiddordeb personol ond heb fod yn un rhagfarnus mewn perthynas ag eitem 3 ar y rhaglen oherwydd bod ei ddarpar ferch yng nghyfraith yn athrawes yn Ysgol Y Graig a chadarnhaodd, yn dilyn derbyn cyngor cyfreithiol, y byddai'n cymryd rhan yn y drafodaeth ac yn pleidleisio.

2 RHAGLEN MODERNEIDDIO YSGOLION Y CYNGOR SIR - ARDAL LLANGEFNI : YSGOL BODFFORDD AC YSGOL CORN HIR

Cyflwynwyd, i'r Pwyllgor ei ystyried, adroddiad y Cyfarwyddwr Addysg, Sgiliau a Phobl Ifanc ynghylch y rhaglen moderneiddio ysgolion mewn perthynas ag ardal Llangefni. Roedd yr adroddiad yn gofyn am sylwadau'r Pwyllgor ar y cynnig *i adleoli ac ehangu Ysgol Corn Hir ar safle newydd i gymryd disgyblion Ysgol Bodffordd, cau Ysgol Bodffordd ac adolygu dalgylchoedd Ysgol Bodffordd ac Ysgol Corn Hir*, er mwyn i'r Pwyllgor Gwaith eu hystyried cyn penderfynu pa un ai i dderbyn y cynnig ai peidio ac awdurdodi'r ymgynghoriad statudol angenrheidiol yn ei gylich.

Cyfeiriodd yr Aelod Portffolio Addysg, Llyfrgelloedd, Diwylliant ac Ieuentid at gais y Pwyllgor Gwaith ym mis Mai 2019 i Swyddogion edrych o'r newydd ar y materion amrywiol mewn perthynas â moderneiddio ysgolion a'r gofynion dan y Côt Trefniadaeth Ysgolion 2018 yn ardal Llangefni ac i ddod ag adroddiad priodol yn ôl i'r Pwyllgor Gwaith maes o law. Mae'r adroddiad uchod yn ymateb i'r cais hwnnw ac os yw'r Pwyllgor Gwaith yn penderfynu ymgynghori ar y cynnig yn yr adroddiad, ar ôl ystyried barn Sgriwtini, bydd proses ymgynghori statudol yn dilyn pan roddir cyfle i'r holl randdeiliaid ymateb i'r cynnig a chyflwyno sylwadau arno. Yna, byddai'r ymatebion i'r ymgynghoriad cyhoeddus yn cael eu hystyried wrth wneud penderfyniad terfynol ynghylch a ddylid symud ymlaen â'r cynnig ai peidio a chyhoeddi hysbysiadau statudol.

Arweiniodd y Cyfarwyddwr Addysg, Sgiliau a Phobl Ifanc y Pwyllgor drwy'r papur cynnig ac amlinellodd y gyrrwyr allweddol ar gyfer newid a nodir yn Strategaeth Moderneiddio Ysgolion y Cyngor, sy'n cael eu crynhoi yn adran 3 y papur cynnig. Wrth gymhwyso'r gyrrwyr allweddol hyn i'r ddarpariaeth addysg yn ardal Llangefni, deuir i'r casgliad y byddai'n rhaid i unrhyw broses foderneiddio ysgolion roi sylw i set o feini prawf sy'n cynnwys safonau addysg; arweinyddiaeth a rheolaeth; adeilad ysgol; lleoedd ysgol digonol; darpariaeth addysg Gymraeg a defnydd cymunedol (adran 4). Rhoddwyd ystyriaeth i un ar ddeg opsiwn / opsiwn amgen rhesymol ar gyfer ardal Llangefni sydd yn cynnwys Ysgol Gyfun Llangefni, Ysgol Bodffordd, Ysgol Corn Hir, Ysgol Y Graig ac Ysgol Talwrn – ac fe'u nodir yn adran 5 y papur cynnig. Daeth dadansoddiad manwl o bob un o'r opsiynau amgen rhesymol i'r casgliad nad oes yr un datrysiad hyfyw ar gyfer ardal Llangefni gyfan. O ganlyniad, ac oherwydd eu hagosrwydd, canolbwyntiwyd ar ganfod datrysiad posib ar wahân ar gyfer dalgylchoedd Ysgol Bodffordd ac Ysgol Corn Hir a dalgylchoedd Ysgol Y Graig ac Ysgol Talwrn (rhoddir sylw manwl i hyn dan eitem 3) a fyddai'n bodloni'r gyrrwyr, ac yn rhoi ystyriaeth hefyd i'r heriau sy'n wynebu'r ysgolion hynny.

Rhoddodd y Swyddog grynodedeb o'r broses ers mis Mehefin 2019, a oedd yn cynnwys ystyried opsiynau amgen ar gyfer ardal Llangefni gyfan. Oherwydd i'r broses hon ddod i'r

casgliad nad oes datrysiad hyfyw ar gyfer ardal Llangefni gyfan, yn dilyn hynny canolbwyntiwyd ar nodi datrysiadau yn seiliedig ar ddalgylchoedd Ysgol Bodffordd/Ysgol Corn Hir ac Ysgol Y Graig/Ysgol Talwrn, gan roi ystyriaeth i'r prif yrwyr a'r heriau y mae'r ysgolion hynny'n eu hwynebu. Ystyriaeth allweddol oedd y rhagdybiaeth yn erbyn cau ysgolion gwledig a nodir yng Nghôd Trefniadaeth Ysgolion 2018 ac, i sicrhau felly bod cymaint â phosib o opsiynau rhesymol yn cael eu harchwilio ar gyfer Ysgol Bodffordd ac Ysgol Talwrn, er nad yw'r olaf wedi'i dynodi'n ysgol wledig dan y Côd. Rhoddwyd ystyriaeth i dair ar ddeg o opsiynau amgen rhesymol (gan gynnwys y cynnig) ar gyfer Ysgol Bodffordd a deg opsiwn amgen rhesymol (gan gynnwys y cynnig) ar gyfer Ysgol Talwrn. Nid yw'r mwyafrif o'r opsiynau hyn yn bodloni'r gyrrwyr ar gyfer ardal Llangefni ac nid ydynt yn ymarferol mewn perthynas â'r ddarpariaeth addysg yn y tymor hir yn yr ysgolion hyn. Cafwyd cyngor cyfreithiol ynghylch y broses a disgwyliadau'r Côt Trefniadaeth Ysgolion 2018.

Cyfeiriodd y Swyddog at yr heriau allweddol y mae Ysgol Bodffordd ac Ysgol Corn Hir yn eu hwynebu (adran 6 y papur cynnig). Cafodd tair ar ddeg o opsiynau amgen rhesymol (gan gynnwys y cynnig) ar gyfer Ysgol Bodffordd ac un ar ddeg opsiwn amgen (gan gynnwys y cynnig) ar gyfer Ysgol Corn Hir eu hystyried a'u dadansoddi yn erbyn y gyrrwyr allweddol ar gyfer moderneiddio ysgolion a'r meini prawf ar gyfer darpariaeth addysg yn ardal Llangefni (adran 7 a 9 y papur cynnig). Yn ogystal, cafodd pob opsiwn amgen rhesymol ar gyfer Ysgol Bodffordd eu hasesu mewn perthynas â'r effaith debygol ar safonau, y gymuned a threfniadau teithio disgyblion (adran 8). Dangosodd yr asesiad bod y cynnig a gyflwynwyd yn cael effaith gadarnhaol ar safonau, dim effaith ar y gymuned ac effaith negyddol ar drefniadau teithio rhai disgyblion. Arweiniodd at y casgliad hefyd y byddai angen i'r Cyngor liniaru effaith y posibilrwydd o gau Ysgol Bodffordd drwy weithio gyda'r gymuned i sicrhau bod y ganolfan gymuned bresennol yn parhau i fod yn hyfyw yn y tymor hir a thrwy ddarparu gwasanaeth bus o'r pentref i safle Ysgol Corn Hir newydd i ddisgyblion cymwys, yn unol â pholisi cludiant ysgol yr Awdurdod. Ar sail y dadansoddiad, mae'r Cyngor yn cyflwyno'r cynnig gerbron fel y datrysiad gorau sy'n mynd i'r afael â'r prif yrwyr ar gyfer darpariaeth addysg yn ardal Llangefni a'r heriau allweddol y mae Ysgol Bodffordd ac Ysgol Corn Hir yn eu hwynebu. Yn ymarferol, byddai'n golygu adleoli Ysgol Corn Hir i safle newydd a byddai'r ysgol yn parhau i weithredu yn y dyfodol; byddai corff llywodraethu Ysgol Corn Hir yn llywodraethu'r ysgol newydd. Byddai'r Awdurdod yn ceisio sicrhau bod cynrychiolwyr o Ysgol Bodffordd ar y corff llywodraethu a byddai Ysgol Bodffordd yn cau.

Rhoddwyd cyfle i Mr Gareth Parry a Llinos Roberts gyflwyno sylwadau ar y papur cynnig o safbwynt Ysgol Bodffordd. Cyfeiriodd Mr Gareth Parry, a oedd yn siarad ar ran Cadeirydd Corff Llywodraethu Ysgol Bodffordd, a Llinos Roberts, a oedd yn siarad fel rhiant i blant yn yr ysgol, at bryderon mewn perthynas â'r –

- Ansicrwydd parhaus ynghylch dyfodol Ysgol Bodffordd o ganlyniad i ymgynghoriadau niferus am ei dyfodol a'r bygythiad parhaus o gau'r ysgol sydd yn peri pryder i staff a rhieni fel ei gilydd.
- Cysylltiadau cymunedol cryf Ysgol Bodffordd a'r effaith negyddol y byddai ei chau yn ei gael ar y gymuned a'r pentref.
- Effaith ar yr iaith Gymraeg a'r diwylliant Cymreig lleol.
- Dibyniaeth y papur cynnig ar ddata ac adroddiadau sydd wedi dyddio wrth gloriannu safonau yn Ysgol Bodffordd.
- Triniaeth anghyfartal wrth ymdrin â'r ddwy ysgol a diffyg tegwch yn y gystadleuaeth am swyddi. Mae'r cynnig yn golygu y byddai Ysgol Corn Hir yn cael ei hadleoli i'r ysgol newydd yn ei chrynswith ond bydd Ysgol Bodffordd yn cau. Byddai'n decach cau'r ddwy ysgol ac adeiladu ysgol newydd a rhoi enw newydd arni.

Pwysleisiodd Mr Dafydd Jones, Cadeirydd Corff Llywodraethu Ysgol Corn Hir sefyllfa ddybryd Ysgol Corn Hir mewn perthynas â chyflwr yr ysgol, bod mwy o ddisgyblion nag o leoedd yn yr ysgol, diffyg lle ac effeithiau posib y diffygion hyn ar iechyd a diogelwch a safonau'r ysgol. Mae'n ysgol Gymraeg sy'n gwasanaethu cymuned Gymraeg ac yn perfformio i lefel uchel ac yn gosod disgwyliadau uchel iddi ei hun. Fodd bynnag, mae ei sefyllfa bresennol yn rhwystr o ran datblygu'r ysgol a gwireddu'r Cwricwlwm newydd. Mae'r ysgol yn haeddu gwell a gallai gyflawni cymaint mwy petai'n meddu ar yr adnoddau priodol. Mae Ysgol Corn Hir yn llwyr gefnogi'r cynnig ac o'r farn bod angen iddo gael ei weithredu heb ragor o oedi.

Esboniwyd bod y Côt Trefniadaeth Ysgolion yn ei gwneud yn ofynnol i roi ystyriaeth i arolygiadau Estyn ac y cynhaliwyd yr arolygiad mwyaf diweddar yn achos Ysgol Bodffordd yn 2015. Fodd bynnag, mae'r papur cynnig yn ceisio adlewyrchu'r gwaith a wnaed yn yr ysgol ers hynny ac mae'n cydnabod bod categori Ysgol Bodffordd wedi gwella, o Ambr (ysgol sydd angen cefnogaeth a monitro sylweddol) i Felyn (ysgol sydd angen cefnogaeth a monitro ysgafn).

Ystyriodd y Pwyllgor y papur cynnig a'r safbwyntiau a fynegwyd gan gynrychiolwyr y ddwy ysgol, a chodwyd y materion canlynol yn ystod y drafodaeth –

- Amser cynnal y cyfarfod hwn o'r Pwyllgor Sgriwtini Corfforaethol. Dywedodd y Cynghorydd Nicola Roberts bod nifer o rieni wedi dweud wrthi eu bod yn dymuno bod yn bresennol yn y cyfarfod ond nad oedd modd iddynt wneud hynny am fod y cyfarfod yn cael ei gynnal yn ystod oriau gwaith. Dywedodd y Cadeirydd ei fod bob amser yn ceisio sicrhau bod y rhai sydd eisiau mynychu cyfarfodydd y Pwyllgor Sgriwtini Corfforaethol yn gallu gwneud hynny, yn arbennig o ystyried y diddordeb mewn materion moderneiddio ysgolion, a phe byddai'n gwybod am y pryderon hyn o flaen llaw byddai wedi ceisio rhoi sylw iddynt – y rheswm am gychwyn y cyfarfod mor gynnar yn y bore oedd natur y busnes i'w ystyried, gyda dwy eitem sylweddol o flaen y Pwyllgor. Cadarnhaodd y Rheolwr Gwasanaethau Cyfreithiol, yn ddibynnol ar y materion i'w trafod, y byddai modd newid amser y Pwyllgor yn unol â hynny. Gofynnodd y Cynghorydd Nicola Roberts am gadarnhad ysgrifenedig ynghylch hynny.
- A fyddai modd i'r cyngor cyfreithiol a dderbyniodd yr Awdurdod mewn perthynas â'r papur cynnig gael ei gyhoeddi ar wefan y Cyngor. Roedd y Rheolwr Gwasanaethau Cyfreithiol yn cynghori yn erbyn hynny gan y byddai'n golygu colli'r fraint oedd ynghlwm â'r cyngor.
- Bod y Pwyllgor yn deall yn llwyr ac yn derbyn difrifoldeb sefyllfa Ysgol Corn Hir. Nid oedd yr Aelodau'n cwestiynu'r rhan o'r cynnig sy'n argymhell adeiladu ysgol newydd ar gyfer Ysgol Corn Hir, ond gofynnodd rhai Aelodau a oedd rhaid aberthu Ysgol Bodffordd er mwyn darparu ysgol newydd ar gyfer Ysgol Corn Hir, a gofynnwyd ai dyma'r llwybr cywir i'w ddilyn.
- A yw'r cynnig yn deg ac yn darparu ateb cytbwys. Cynigiodd y Cynghorydd Dylan Rees (sydd hefyd yn Aelod Lleol) y byddai cau'r ddwy ysgol ac agor ysgol newydd yn ateb tecach – mae'r cynnig yn ei ffurf bresennol yn golygu, drwy ddarparu ysgol newydd, y byddai Ysgol Bodffordd yn dod yn rhan o Ysgol Corn Hir ac, o'r herwydd, nid yw'r ddwy ysgol yn gyfartal ac nid oes cyfle cyfartal i staff Ysgol Bodffordd.
- Sicrwydd ynghylch hirhoedledd yr ysgol newydd arfaethedig ac y byddai'n parhau i fod yn addas o gofio y byddai'r Awdurdod yn talu amdani dros gyfnod o 50 mlynedd ac o ystyried hefyd nad yw adeilad presennol Ysgol Corn Hir yn addas ar ôl cyfnod o 25 mlynedd yn unig.
- Bod angen sicrhau buddion gorau holl blant yr ardal. Dywedodd y Cynghorydd Nicola Roberts (sydd hefyd yn Aelod Lleol) mai'r ffordd orau o gyflawni hyn oedd drwy gael ysgol newydd sy'n diwallu anghenion pawb ac yn darparu adeilad ysgol a safonau addysg o'r ansawdd gorau. Er bod Ysgol Corn Hir wedi'i lleoli mewn tref, mae'n ysgol gymunedol a'r hyn y mae'r cynnig yn ceisio'i gyflawni yw ymestyn y gymuned honno a dod â hi'n

agosach. Mae cymuned yn golygu'r bobl sy'n byw ynddi, nid adeiladau ysgol, a chyfrifoldeb y bobl hynny yw sicrhau bod y gymuned yn ffynnu. Nid yw'r adeiladau ysgol presennol yn addas ac nid yw adnoddau'n cael eu rhannu'n gyfartal ymysg yr ysgolion a'r plant. Rhaid canfod ateb drwy gyfrwng yr ymgynghoriad ac mae angen annog pawb i gyfleu eu safbwyntiau er mwyn llunio darlun cyflawn a chytbwys.

Wrth nodi'r pwyntiau a wnaed, rhoddodd Swyddogion sicrwydd, petai cymeradwyaeth yn cael ei sicrhau i gynnal ymgynghoriad, yna byddai'r holl randdeiliaid yn cael cyfle i leisio eu barn yn ystod y cyfnod ymgynghori; byddai'r Awdurdod yn paratoi ymateb manwl i'r ymgynghoriad a'r cyflwyniadau a dderbyniwyd yn ystod y cam hwnnw o'r broses.

Cynigiodd y Cynghorydd Nicola Roberts, ac eiliodd y Cynghorydd J. Arwel Roberts y cynnig, bod y Pwyllgor yn argymhell i'r Pwyllgor Gwaith ei fod yn derbyn y cynnig fel y'i cyflwynwyd ac yn symud ymlaen i gynnal yr ymgynghoriad cyhoeddus angenrheidiol.

Cynigiodd y Cynghorydd Dylan Rees welliant, sef argymhell i'r Pwyllgor Gwaith ei fod yn cynnal ymgynghoriad statudol ar opsiwn 7.2 (adeiladu ysgol 21ain Ganrif newydd ar gyfer Ysgol Bodffordd ac Ysgol Corn Hir a chau'r ddwy ysgol) ar y sail y byddai'n hynny'n sicrhau tegwch i'r ddwy ysgol fel rhan o'r broses ad-drefnu. Ni chafodd y cynnig ei eilio.

Cynigiodd y Cynghorydd Lewis Davies welliant pellach, a eiliwyd gan y Cynghorydd Bryan Owen, sef argymhell i'r Pwyllgor Gwaith ymgynghori ar ysgol newydd ar gyfer Ysgol Corn Hir a chadw Ysgol Gymuned Bodffordd ar agor ac ystyried ei ffedereiddio gydag ysgol arall.

Yn y bleidlais a ddilynodd, carwyd y cynnig gwreiddiol (a wnaed gan y Cynghorydd Nicola Roberts) gan fwyafrif o aelodau'r Pwyllgor.

Ar ôl ystyried y wybodaeth a gyflwynwyd yn yr adroddiad ac ar lafar yn y cyfarfod, penderfynodd y Pwyllgor argymhell i'r Pwyllgor Gwaith ei fod yn cymeradwyo'r cynnig i "adleoli ac ehangu Ysgol Corn Hir ar safle gwahanol i gymryd disgyblion Ysgol Bodffordd, cau Ysgol Bodffordd ac adolygu dalgylchoedd Ysgol Bodffordd ac Ysgol Corn Hir" a'i fod yn symud ymlaen i gynnal yr ymgynghoriad cyhoeddus angenrheidiol ynghylch hynny.

3 RHAGLEN MODERNEIDDIO YSGOLION Y CYNGOR SIR - ARDAL LLANGEFNI : YSGOL TALWRN AC YSGOL Y GRAIG

Cyflwynwyd, i'r Pwyllgor ei ystyried, adroddiad y Cyfarwyddwr Addysg, Sgiliau a Phobl Ifanc mewn perthynas â'r rhaglen foderneiddio ysgolion yn ardal Llangefni. Roedd yr adroddiad yn gofyn am farn y Pwyllgor ynghylch y cynnig *i gynyddu capasiti Ysgol Y Graig i gymryd disgyblion Ysgol Talwrn, cau Ysgol Talwrn ac adolygu dalgylchoedd Ysgol Talwrn ac Ysgol y Graig*, er mwyn i'r Pwyllgor Gwaith roi ystyriaeth iddynt cyn penderfynu pa un ai i dderbyn y cynnig ai peidio ac awdurdodi'r ymgynghoriad cyhoeddus statudol angenrheidiol ynghylch hynny.

Cyfeiriodd yr Aelod Portffolio Addysg, Llyfrgelloedd, Diwylliant ac Ieuencid at gais y Pwyllgor Gwaith ym mis Mai 2019 i Swyddogion edrych o'r newydd ar y materion amrywiol mewn perthynas â moderneiddio ysgolion a'r gofynion dan y Côt Trefniadaeth Ysgolion 2018 yn ardal Llangefni, ac i gyflwyno adroddiad priodol i'r Pwyllgor Gwaith maes o law. Mae'r adroddiad uchod yn ymateb i'r cais hwnnw ac os yw'r Pwyllgor Gwaith yn penderfynu ymgynghori ar y cynnig yn yr adroddiad, ar ôl ystyried barn Sgriwtini, bydd proses ymgynghori statudol yn dilyn pan roddir cyfle i'r holl randdeiliaid ymateb i'r cynnig a chyflwyno sylwadau arno. Yna, byddai'r sylwadau a dderbyniwyd yn ystod y broses honno yn cael eu hystyried wrth wneud penderfyniad terfynol ynghylch a ddylid symud ymlaen â'r cynnig ai peidio a chyhoeddi hysbysiadau statudol.

Arweiniodd y Cyfarwyddwr Addysg, Sgiliau a Phobl Ifanc y Pwyllgor drwy'r papur cynnig a dywedodd bod y gyrrwyr allweddol ar gyfer newid a nodir yn Strategaeth Foderneiddio Ysgolion y Cyngor yn cael eu crynhoi yn adran 3 y papur cynnig. Fel y nodwyd dan eitem 2, wrth gymhwyso'r gyrrwyr allweddol hyn i'r ddarpariaeth addysg yn ardal Llangefni yn ehangach deuir i'r casgliad y byddai'n rhaid i unrhyw gamau i foderneiddio ysgolion roi sylw i set o feini prawf sy'n cynnwys safonau addysg; arweinyddiaeth a rheolaeth, adeilad ysgol; lleoedd ysgol digonol; darpariaeth cyfrwng Cymraeg a defnydd cymunedol (adran 4). Rhoddwyd ystyriaeth i un ar ddeg opsiwn amgen / opsiwn ar gyfer ardal Llangefni, sydd yn cynnwys Ysgol Gyfun Llangefni, Ysgol Bodffordd, Ysgol Corn Hir, Ysgol Y Graig ac Ysgol Talwrn, fel y nodir yn adran 5 y papur cynnig. Daeth dadansoddiad manwl o bob un o'r opsiynau amgen rhesymol i'r casgliad nad oes unrhyw ddatrysiad hyfyw ar gyfer ardal Llangefni gyfan. O'r herwydd, ac oherwydd eu hagosrwydd, canolbwyntiwyd ar ganfod datrysiadau posib ar wahân ar gyfer dalgylchoedd Ysgol Bodffordd ac Ysgol Corn Hir (sy'n cael sylw dan eitem 2) a dalgylchoedd Ysgol Y Graig ac Ysgol Talwrn a fyddai'n bodloni'r gyrrwyr allweddol, a chan roi ystyriaeth hefyd i'r heriau sy'n wynebu'r ysgolion hynny.

Cyfeiriodd y Swyddog yn benodol at y prif heriau y mae Ysgol Talwrn ac Ysgol Y Graig yn eu hwynebu (adran 6) ac at yr opsiynau amgen rhesymol a gafodd eu hystyried a'u harchwilio mewn perthynas â'r ddwy ysgol (adrannau 7 ac 8 o'r papur cynnig, yn y drefn honno). Cafodd deg opsiwn amgen rhesymol, gan gynnwys y cynnig ar gyfer Ysgol Talwrn a naw opsiwn amgen rhesymol, gan gynnwys y cynnig, ar gyfer Ysgol Y Graig eu hystyried a'u dadansoddi yn erbyn y gyrrwyr moderneiddio ysgolion allweddol. Dangosodd y dadansoddiad mai'r cynnig sy'n cael ei ystyried yn unig sy'n cael effaith gadarnhaol ar safonau, y gymuned a threfniadau teithio disgyblion yn eu cyfanrwydd. Daeth i'r casgliad hefyd y bydd angen i'r cyngor liniaru effaith y posibilrwydd o gau Ysgol Talwrn drwy ddarparu cludiant i ddisgyblion Ysgol Talwrn i Ysgol y Graig a fydd wedi cael ei hystyried. O ganlyniad i'r asesiad, mae'r Awdurdod yn cyflwyno'r cynnig ar ei ffurf bresennol. Yn ymarferol, byddai hyn yn golygu ehangu Ysgol Y Graig, a fyddai'n parhau i weithredu yn y dyfodol, a byddai corff llywodraethu Ysgol Y Graig yn llywodraethu'r ysgol fwy. Byddai'r Awdurdod yn ceisio sicrhau bod cynrychiolwyr o Ysgol Talwrn ar y corff llywodraethu a byddai Ysgol Talwrn yn cau.

Rhoddwyd cyfle i Mr Islwyn Humphreys, Cadeirydd Corff Llywodraethu Ysgol Talwrn gyflwyno sylwadau ar y papur cynnig o safbwynt Ysgol Talwrn, a gwnaeth y pwyntiau canlynol –

- Ni chafwyd atebion i rai o'r cwestiynau a godwyd yn ystod ymgynghoriadau blaenorol. Er enghraifft, cyfleoedd i ddisgyblion Ysgol Talwrn gymryd rhan mewn gweithgareddau ar ôl ysgol gan fod y lôn rhwng Talwrn ac Ysgol Y Graig yn beryglus, a statws adeilad Ysgol Talwrn.
- Effaith niweidiol y cynnig ar y gymuned, ar yr iaith Gymraeg, ar ddiwylliant yn lleol ac ar unigolion.
- Nid oes unrhyw opsiynau amgen yn cael eu cynnig i ymgynghori arnynt.
- Mae safonau addysg yn Ysgol Talwrn yn dda, ac yn cymharu â safonau yn Ysgol Y Graig, ac mae'r data diweddaraf ac adroddiadau GwE yn tystio hynny, gyda disgyblion ar draws yr ysgol yn gwneud cynnydd cadarn ac yn perfformio'n dda ac, mewn rhai achosion, yn cyflawni Lefel 6.
- Mae Ysgol Talwrn yn ysgol sy'n ffynnu ac mae ganddi drefniadau cydweithio da gydag Ysgol Llanbedrgoch.
- 4 o leoedd gwag yn unig sydd yn yr ysgol.
- Fforddiadwyedd y cynnig a'r costau benthyca i'r Cyngor yn yr hir dymor ar ased fydd yn colli gwerth.

Dywedodd Dr Iestyn Pierce, Cadeirydd Corff Llywodraethu Ysgol Y Graig bod mwy o ddisgyblion nag o leoedd yn yr ysgol ac o'r herwydd bod angen estyniad newydd o ryw fath i gwrdd â'r gofynion yn yr hir dymor.

Roedd y Cynghorydd Nicola Roberts (sydd hefyd yn Aelod Lleol) yn cydnabod bod ymgynghoriadau niferus ynghylch dyfodol Ysgol Talwrn yn ystod y blynyddoedd diwethaf wedi bod yn heriol i'r ysgol, y staff, y rhieni a'r gymuned ehangach. Er ei bod yn cydnabod fod safonau addysg wedi gwella yn yr ysgol yn ystod y blynyddoedd diwethaf, nid yw adeilad yr ysgol yn ddigonol, gwendid y mae'n ei rannu gydag Ysgol Y Graig. Fodd bynnag, o ganlyniad i'r safonau da yn Ysgol Talwrn, ac oherwydd rhesymau cydraddoldeb, gofynnodd a ddylid ystyried trosglwyddo staff Ysgol Talwrn er mwyn cadw arbenigedd gwerthfawr. Heblaw am hynny, roedd o'r farn bod y papur cynnig yn mynd i'r afael â'r holl ystyriaethau perthnasol ac anogodd bawb sydd â diddordeb yn y mater i gyflwyno eu safbwyntiau petai'r cynnig i gynnal ymgynghoriad statudol yn cael ei gymeradwyo.

Gofynnodd y Cynghorydd Dylan Rees (sydd hefyd yn Aelod Lleol) a roddwyd digon o bwyslais ar ganlyniadau'r Asesiad Effaith Cymunedol, sy'n datgan y byddai'r cynnig yn cael effaith niwtral ar bobl a chymuned Talwrn, o ystyried bod y gymuned yn defnyddio'r ysgol, e.e. Clwb Cinio Pensiynwyr, gan y byddai'r cynnig yn debygol o gael effaith ar hynny petai'n cael ei weithredu.

Awgrymodd y Cynghorydd Bryan Owen y byddai'n well gwario'r arian ar foderneiddio Ysgol Talwrn a thrwy hynny gyfrannu at ddiogelu gwasanaethau y mae'r ysgol yn eu darparu i'r gymuned a hyfywedd y gymuned ei hun.

Wrth nodi'r pwyntiau a wnaed, rhoddodd Swyddogion sicrwydd, pe byddai penderfyniad yn cael ei wneud i gynnal ymgynghoriad cyhoeddus ar y cynnig, yna byddai'r holl randdeiliaid yn cael cyfle i fynegi eu safbwyntiau yn ystod y cyfnod ymgynghori; byddai'r Awdurdod yn paratoi ymateb manwl i'r ymgynghoriad a'r sylwadau a gyflwynir yn ystod y cam hwn o'r broses.

Cynigiodd y Cynghorydd J. Arwel Roberts bod y Pwyllgor yn argymhell i'r Pwyllgor Gwaith ei fod yn derbyn y cynnig fel y'i cyflwynwyd ac yn symud ymlaen i gynnal yr ymgynghoriad statudol angenrheidiol ac eiliodd y Cynghorydd Nicola Roberts y cynnig.

Cynigiodd y Cynghorydd Lewis Davies welliant, ac fe'i eiliwyd gan y Cynghorydd Bryan Owen, sef argymhell i'r Pwyllgor Gwaith ei fod yn ymgynghori ynghylch cadw Ysgol Talwrn ar agor ac ystyried ei ffedereiddio ag ysgol arall (Ysgol Llanbedrgoch o bosib).

Cafodd y cynnig gwreiddiol (a wnaed gan y Cynghorydd J. Arwel Roberts) ei gario gan fwyafrif o aelodau'r Pwyllgor yn y bleidlais a ddilynodd.

Ar ôl ystyried y wybodaeth a gyflwynwyd yn yr adroddiad, ac ar lafar yn y cyfarfod, penderfynodd y Pwyllgor argymhell i'r Pwyllgor Gwaith ei fod yn cymeradwyo'r cynnig i "gynyddu capasiti Ysgol Y Graig i gymryd disgyblion o Ysgol Talwrn, cau Ysgol Talwrn ac adolygu dalgyloedd Ysgol Talwrn ac Ysgol Y Graig" a'i fod yn symud ymlaen i gynnal yr ymgynghoriad statudol angenrheidiol ynghylch hynny.

**Cynghorydd Aled Morris Jones
Cadeirydd**